



IS AGOG E  
I N C A N O N I C A S

Septem Epistolas, qua (ut in  
Paulinis) compositionis œ-  
conomia, & germana  
dispositio mon-  
stratur.

Eodem Bened. Aretio  
Auctore

L A V S A N N A E.

Excudebat Fr̃aciscus le Preux,  
Illust. D. Bernensiu Typog.

1579.

1878



1878. n. 2. 20.



# ILLVSTRI ET DOMESTICA

Nobilitate Splendidissimo viro D. Odoar-  
do Thyenao Ciconia Comiti Domino  
suo honorando. S. P.



Dfero ad te, illustris & generose  
vir, munusculum, qualia nostra esse  
solent, hoc est chartaceū, & tenue.  
Quando enim tu in me amando &  
ornando, nullum officii genus præ-  
termittis, volui saltem ego, tenui isto opusculo signi-  
ficationem grati animi extare, quandoquidem alia  
via mihi nulla patefacta est. Et quanquam eius-  
modi sit ut nec commendari, præsertim apud tantū  
virum, possit, nec ad dignitatem, splendoremque  
virtutum tuarum quicquam conferre, tamen, qui  
tuus est candor, & erga me studium, grato, ut spe-  
ro, admittes animo pusillum hospitem, patierisque  
ut tui nominis splendore ornatioꝝ & commendatioꝝ  
prodeat.

Dominus Iesus te cum omni tua familia con-  
seruet. Amen. Vale, Bernæ Cal. Februar. CIO IO  
LXXIIII.

Illustriss. D. T.

studiosissimus Bene-  
dictus Arelius.

a. ij.



EPISTOLÆ DIVI IACO-  
BI APOSTOLI  
dispositio.

*Argumentum Epistola.*



Apostolus Iacobus magis in-  
struit pios quomodo vi-  
uendum, quàm quid sit  
credendum. Ideo de mo-  
ribus renati hominis semper loqui-  
tur, de fide non perinde. At in profes-  
sis religionem Christi, requirit impri-  
mis tolerantiam sub cruce, quæ Chri-  
sti nomine obtruditur, à qua diligen-  
ter separat eam crucis speciem, quam  
nostra nobis imponit caro. Deinde  
in conuētibus sine prosopopie con-  
ueniendum esse docet, fidem ritè or-  
nadam omni bonorum operum stu-  
dio, ne inani quodā simulachro de-  
mētemur, quemadmodum philoso-  
phi quidam speciosè de virtutibus  
differebant, cùm interim mores illo-  
rum omni scelerum turpitudine ef-  
sent



ent defœdatis, &c.

## AUTOR EPISTOLÆ.

Iacobus, qui autor est præsentis epistolæ, fuit de numero duodecim Apostolorum. Nam Græci expressè τὸς Ἀποστόλους addunt, & Syri qui mox post Apostolorum tempora Euangelium Christi & has epistolas, quas appellamus canonicas cum aliis in suam linguam transtulerunt, Iacobum Apostolum agnoscunt. Cæterum quia apud Matt. 10. cap. duo recēsentur Iacobi in catalogo Apostolorum, non frustra quæri potest, quis nam ille sit, Zebedæi-ne, an Alphæi filius: In huius quæstionis decisione sequor Hieronymi sententiam, qui hunc Alphæi filium pronūciat esse, & eundem esse qui Iacobus minor, Iacobus iustus, Iacobus frater Iudæ, & Iacobus frater Domini dictus sit. Itaque hic erit Iacobus, quem Apostolus Paulus Hiero-

solymis cōuenit, vt est ad Gal. ca. i. v-  
bi inquit se præterea Apostolū nullū  
vidisse præter Iacobū fratrem Domini.  
Porro dictus est frater Domini, quòd  
esset filius Mariæ Cleophæ quæ soror  
fuit Mariæ virginis, & more scripturæ  
fratres dicuntur qui reuera erāt cōsobri-  
ni. Hæc, vt apparet, verissima sententia  
est de autore præfctis epistolæ. Non  
ignoro interea quibusdā magis place-  
re hūc Iacobum nō esse de cēlu Apo-  
stolorū, sed de numero septuaginta  
discipulorum, & hunc esse quem ap-  
pellant Iacobum Obaliæ. Sed proba-  
biles tantū sunt cōiecturæ, nec plus  
valent quàm superiores rationes, &  
quia hac sententia plurimum decedit  
de autoritate epistolæ, magis arridet  
superior, vt & Apostolica sit & catho-  
lica. Hinc intelligi potest cur veteres  
catholicam appellarint vnà cum se-  
quentibus, quòd scil. non vni priuato  
homini

homini, aut vni priuatæ ecclesiæ, sed omnibus piis esset scripta. Deinde, quòd non minus pòderis in probando habere debeat, quàm Paulinæ epistolæ. Præterea, quòd habeat generales vitæ regulas, quæ ad omnes spectant. Eadem ratione dicta est canonica, quanuis ea vox à nōnullis damnetur: tamen hæc appellatio ostendit eam non minus esse in canone, quàm sint Paulinæ, nec minus autoritatis huic tribuendū esse. Itaq; ostēdit consensū & doctrinæ & ecclesiæ iudiciū recipientis hanc cum reliquis pari auctoritate. Porro, qui dicunt non esse Apostolicam, hæc ferme habēt argumenta. Primū, quòd locum de fide Abrahæ ex 15. cap. Geneseos contra mentem Pauli ad Rom. 4. applicet operibus. Locus est infra cap. 2. ver. 25. Sed facilè responderi potest non fieri hoc contra mentem Pauli. Nam bo-



na fide citat Mosen, & ostendit ex operibus Abrahami illustratam esse illius fidem. Quam sententiam haud dubiè Apostolus Paulus quoque approbasset, cum & ipse velit operosam esse fidem, nec vnquam probet inane fidei simulachrum.

2 Secundo loco dicunt illum nunquam vel rarò saltem de Christo loqui, quo nomine nihil frequentius sit in ore reliquis Apostolis. Responderemus illum satis testari quantum Christo deferat cum ab illo exordiat. Porro, cum esset correcturus mores malè exprimentium doctrinam Christi, frequētior debuit esse in corripendis vitiis: & vrgendis bonis operibus, quàm fidei ratione, cū iam Christianis constaret quid credendum esset, non perinde autem quomodo viuendum: aut si etiam hoc constabat, pauci tamen erant qui vita & moribus

bus hoc vellent exprimere.

3 Tertio, & hoc non videtur Apostolicum, quòd cap. 2. loquens de lege, vocet eam libertatis legem, cum Apostolus Paulus potius seruitutis, mortis, iræ, & peccati ministram appellet. Respondeo, non eodem cõsilio hoc fieri. Nam Paulus contra Iudæos agens rectè sic appellat, cùm illi hãc vrgerent quasi necessariam ad salutem, & per legem intelligebant ipsas ceremonias, quãdoquidem ipsam circuncisionem & similia ex lege obtrudebant, non moralia. Contra Iacobus de morali lege loquitur, ideo iubet omnes sic loqui & sic facere, quasi per legẽ libertatis iudicãdos, & lex libertatis vtique Christi est, cuius doctrina imprimis requirit bonos mores: libertatis autem, quia nos nõ ligat ad ceremonias externas, sed hilari spiritu & spõte Deo seruit omni bono-

rum genere. Itaque nihil hic est quod non sit Apostolicum.

## QVIBVS SIT SCRIPTA Epistola.

Testatur Iacobus in titulo scribere Iudæis cōuersis & dispersis in omni terrarum orbe, quæ quidem specialia sūt. Verū cum in progressu doctrinæ vbique generalia de moribus det præcepta, vtique ad nos etiam pertinet, & ad omnes fideles non minus quàm epistola ad Romanos, aut illæ ad Timotheum, ac similes. Nam communes mores & vniuersales de moribus regulæ, omnes eiusdē professionis homines ligant.

## OCCASIO.

Occasionē huic epistolæ præbuerunt Christianorum mores, qui malè doctrinam Christi vita exprimebant. Nam maturè hoc malum ecclesiam inuasit, quod dixit Dominus  
Christus



Christus de Iuda is apud Matt. 23. In cathedra Moſis ſedēt, quæ vos docuerint facite, ſecūdūm autem opēra ipſorum nolite facere, ſignificās Iudæos nō rectē philoſophari in lege Moſis. Sic Chriſti eccleſia multos habuit quidem profeſſores fidei: pauci tamē erant, qui Chriſtianum eſſe putarent nihil aliud eſſe, quā vita & moribus teſtari innocentiam. Horum ergo præpoſteros mores corrigit.

## GENVS.

Principale genus eſt exhortatorium, vt fit in deliberationibus, vbi regulæ & præcepta de moribus dantur. Accedunt poſtea quæ hoc exornant, vt Διακτικόν, ἐπαινετικόν, ψευτικόν & ſimilia.

## PROPOSITIO.

Scopus Apoſtoli eſt, inſtituere pios quomodo viuendū ſit in hoc mūdo, vt hæc ſit illius ſentētia, Piis imprimis

curandum est, vt omni bonorum operum studio professionem fidei suę ornēt, ideò passim vrget virtutes renati hominis. Hanc propositionem desumimus ex cap. 1. ver. 22. Estote factores sermonis, & non solùm auditores decipientes vos ipsos, & cap. 2. ver. 14. Quæ erit vtilitas, si quis dicat fidem se habere, opera autẽ non habeat, poterit-ne fides illum seruare? & ver. 20. itẽ 26. fides sine operibus mortua est: significās ipsam professionem fidei sine studio bonorum operum esse merum simulachrum. Et capit. 3. ver. 13. Siquis sapiēs est inter vos, ostendat ex honesta conuersatione opera sua, & cap. 4. ad finem, Sciēti bonum facere & non facienti, hoc ipsi peccatum est.

### PARTES.

Partes epistolæ principaliter duæ sunt. Nam primo constat titulo, quo exprimitur

exprimitur autor, & quibus dedicitur, item honesta comprecatione salutantur. Secunda pars, quæ totū occupat epistolæ corpus, est exhortatio ad bonos mores, ac constat his locis. Primū hortatur ad tolerantiam præstandā sub cruce, qui locus hoc pacto tractatur. Primū, exordium est ab ipsa propositione, cuius sententia est, Pij gratanter crucem nomine Christi debent subire. Hanc propositionem mox confirmatione probat. Tertiò, præoccupatione ostendit quibus mediis ad hanc virtutem perueniamus. Quartò, digressionem ostendit ad omnes pertinere hanc doctrinam, pauperes & diuites. Ultimò, exclamatione concludit locum. Atque hæc ad unā speciem crucis pertinet, quæ nomine Christi imponi solet. Superest altera species tentationis, quæ oritur à propria carne: hæc studiosè separat à supe-



riori, ac sua cōstat etiam tractatione. Et hactenus locus primus de cruce, quam Apostolus vocat in genere tentationem. Secundus locus 2. capite proponitur, de conuentibus publicis cōgregādis sine prosopolipsia, quem locum illustrat appposito exemplo, & expressa mimefi, aliisque locis tractationis. Tertius locus est de fide ornan- da operibus, ac planè pertinet hic locus ad generalem sententiam, contra eos quibus fidei nomen frequentius erat in ore, quàm bonorum operum exempla in moribus. Quartus locus est cap. 3. de vitijs linguæ & de eiusdē commodis, vt reprimeret auuiditatem docēdi in nonnullis. Quintus locus contra contentiones & similia vitia, quæ ex voluptatibus oriebātur, qualia sunt ira, obtrectatio, inuidia, æmulatio. Sextus contra præsumptionem oris in quotidiano sermone. Locus il-  
le

le tractatur cap. 4. à ver. 13. ad finē vsq;.  
Septimus de officijs diuitum & pau-  
perum, qui & ipsi in vtraque fortuna  
professionem ornare debent. In diui-  
tibus liberalitatem requirit: confiden-  
tiam, tenacitatem & fraudem taxans.  
In pauperibus verò patiētiam postu-  
lat exemplo Prophetarum & Iobi : i-  
tem ne murmurent seu cōtra Deum,  
seu cōtra diuites tenaciores. Reliqua  
iterum ad omnes ordines pertinent,  
vt quòd non sit iurandum, diligēter  
orandum & orationi coniungendas  
confessiones peccatorum. Demum  
omnibus incumbendum vt errantes  
reducātur in viam, quæ omnia si præ-  
stiterimus vtique professionem fidei  
quàm elegantissimè ornabimus.



## DISPOSITIO PRIORIS

Epistolæ D. Petri.

*Argumentum.*

Ocet Apostolus Petrus, quāta beneficia Deus conferat electis per cognitionem Euangelij, eāque solam habere cōsensum cum Prophe-  
tica doctrina, ideo vt antiquissima &  
certissima seriò est conseruāda. Hinc  
descēdit ad mores & omnes ad virtu-  
tes renati hominis prouocat, nec so-  
lūm in genere, sed descendit ad spe-  
cialia, vt quid subditi debeant magi-  
stratui, quid serui heris, quid vxor ma-  
rito, quid maritus vxori, quid doctor  
gregi, & quid grex doctoribus, & si-  
milis multa, quæ veram habent ethi-  
cam philosophiam Christianam.



## AVTOR EPISTOLÆ.

Autor epistolæ omnium consensu est Apostolus Petrus, qui natione fuit Galilæus, ex vico Bethsaida oriū-  
 dus, patrem habuit Ioannem piscato-  
 rem, fratrem Andream, eiusdem pro-  
 fessionis hominem, cum quo ascitus  
 est ad Apostolatū dum piscarētur ad  
 mare Galilææ, vt est apud Matt. cap.  
 4. Nomē illi fuit ex circuncisione Si-  
 meon, quod ei mutauit Dominus, vt  
 est Mar. 3. & Ioan. 1. Tu es Simeon fi-  
 lius Ionæ, vocaberis Cepha, quod in-  
 terpretatur Petrus. Sonat autē Ceph  
 aut cepha petram. Græci more Attico  
 πέτρον verterunt. Et quia Syra est di-  
 ctio, ideo in sua versione hanc clausu-  
 lam (quod interpretatur Petrus) non  
 habent. In inscriptione tamen huius  
 epistolæ omnia tria cōiunxerunt, E-  
 pistola Petri Simeonis Cephæ, vt in-  
 telligamus indubitāter epistolam ad

b. j.



Apostolum Petrum pertinere. Porro Petrus videtur dictus propter fidei constātiā & robur: præterea quòd singulari audacia esset præditus interrogandi Dominum, & respondendi pro aliis, vt est videre apud Mat. 16. & 18. capitibus.

### QVIBVS DEDICETVR EPISTOLA.

Scribitur epistola præsens vt constat ex titulo aduenis & peregrinis, quam vocē ferme omnes intelligunt de Iudæis, qui tum propriè dicti sunt aduenæ & dispersi in toto imperio Romano, quo sensu solis Iudæis scriberetur. Cæterum si expēdamus consequentia, videtur totius ecclesiæ habita esse ratio, nō solū Iudæorum. Nam infra cap. 2. ver. 10. loquitur etiā de Gentibus conuersis, qui olim non fuistis populus, nūc populus Dei, qui non eratis misericordiam consecuti,  
nunc

nunc eam consecuti estis, dilecti oro vos quasi aduenas & peregrinos, &c. Quæ certè de Iudæis non possunt solum intelligi. Sic cap. 4. ver. 3. loquitur cum fidelibus tanquam ex Gentibus cōuersis. Itaque sic statuendū est, principem Apostolorum Petrum nō tam Iudæorum quàm omnium cōuersorum habuisse rationem, quandoquidem sancti propriè sunt aduenæ & peregrini in hoc mundo.

## OCCASIO.

Occasio, vt apparet, oblata est ex aduentu Syluani, qui priùs cum Paulo in diuersis locis docuerat & instituerat ecclesias, ad quas nunc rediturus Babylonem transiuit, & istic vt videtur, cōuenit Petrum à quo hāc epistolam ad omnes electos accepit, vt partim armarētur cōtra aperta pericula, partim instruerētur contra fallos fratres, qui passim sanam doctrinam vab.

b. ij.



riis modis corrumpebāt, quemadmodum Satan versutus est interpret religionis.

### GENVS.

Genus principale *πορορεωτικὸν* est quia bene & rectè institutos hortatur ad constantiam in doctrina Evangelica, Accedūt postea *Διδασκτικὸν* quo docet doctrinam Evangelij antiquissimam esse & consentire cum doctrina Prophetarum. Sic quædam sunt *Εωαννετικὰ*, quibus laudat bene curretes. Quædam *παίδευτικὰ*, quibus instituit omnes ordines, quòd sit singulorum officiũ, & quædam *Ψευτικὰ*, quibus inuehitur in corruptores sanæ doctrinæ.

### PROPOSITIO.

Propositionem sumimus ex 13. ver. 1. capitis, vbi inquit, perfectè sperate in gratiam vobis oblatam in reuelatione Iesu Christi. Itē ex ver. 12. 5. cap. vbi

vbi inquit, scripsi vobis breuiter vt exhortarer & testarer hęc esse veram gratiam Dei, in quam collocati estis. Itaque hęc est sententia Apostoli, In hac religione de Christo, quam iam didicistis debetis esse constātes, eamque vita & moribus quā decētissimē ornare, quod indubiē est perfectē sperare in gratiam Dei, & agnoscere hanc vnā esse veram religionē, quę Deo placeat. Propositionis capita duo sunt, prius de cōstantia pręstāda in suscepta religione, hanc partem absoluit primo cap. & habet ferme duo eius fundamēta. Prius quod per hanc doctrinam nobis summa Dei beneficia offerantur. Alterum, quòd hęc doctrina cōsentiat cum Prophetis. Nam ex his duobus sequitur: ergo oportet esse constantes in hac doctrina, & eā summopere exosculari. Posterius membrum propositionis agit

de bonis moribus, & officiis renati hominis, quæ omnia pertinent ad *τελειότητα* spei, quam requirit ab electis.

### PARTES.

Partes ita connecto. Initio est titulus, qui continet personam scribentis & personam eorum ad quos scribitur, & demum piam cōprecationem. Secundo loco ponitur exordiū, quod ducitur à rerum magnitudine. Orditur enim à cōmemoratione summorum beneficiorum Dei, quæ piis offeruntur in hac professione, qualia sunt regeneratio, conseruatio in omni fortuna, consolatio in aduersis, probatio fidei, & similia. Quæ eò faciunt, ut animum legentis excitent, & rapiant in admirationem diuinæ gratiæ. Istis mox addit consensum Propheticum cui innititur Euāgelica professio. Atque hætenus exordium, quod planè  
facit



facit ad attentionem. Tertio loco sequitur *πρότασις* principalis, in hac doctrina perfectè consistendum esse, hoc est, constanter inhærendū illi. Constantiam iam probavit ex tractatione exordij, ideo mox transit ad alterum membrum propositionis de innocentia vitæ. Cui annectitur quarto loco *κατασκευὴ* cōfirmatio, vsque ad finem 1. capitis. Initio 2. capitis est renouatio propositionis, de vitæ innocentia seruanda, quam tanquam *πόρισμα* ex superioribus infert, & mox nouis rationibus & argumentis propositū suū munit. In quo versatur vsque ad ver. 13. quo loco *θέσις* quodammodo deducit ad speciem, & ostendit quibus officiis obediētia sit declaranda erga magistratum. Deinde quomodo serui colere debeant suos heros. Capite 3. hanc eādē rem persequitur. Nam cōmemorat adhuc œconomica offi-

cia vxoris & mariti, à quibus iterum se recipit ad generalia, commemorās talia, quæ ad omnem sexum & ordinem spectāt, vsque ad finem illius capituli. Capite 4. iterum est renouatio propositionis, ab initio capituli, cui nouæ adduntur rationes vsque ad ver. 8. à quo specialia iterum commēdat, dilectionem, hospitalitatem, in docendo vigilantiam, in afflictionibus constantiam, innocentiam in persecutionibus, & similes virtutes. Cap. 5. specialia persequitur. Nā ostēdit quid doctores gregi debeant, & vicissim grex suis doctoribus. Item quare uerētia iuuenes senioribus obedire debeāt. Mox ad generales virtutes iterū cōuertitur, vsque ad ver. 10. quo loco statuatur 5. pars epistolæ quæ cōtinet epilogū, qui complectitur ferme illa: Comprecationē, propositionis renouationē, & mutuas salutationes, &c.



## COMPOSITIO POSTE-

rioris Epistolæ D. Petri.

*Argumentum.*



Postolus Petrus in priori epistola magis voluit red dere cōstantes in profes- sione Christiana, ne scil. pij metu periculorum, aut mole per- secutionum deficerent à veritate. In hac autem posteriore magis hoc vr- get, vt pij crescāt in dies in renati ho- minis virtutibus, quibus professio ip- sa est ornanda: differit interea de aliis quoque locis, vt de cauēdis falsis do- ctoribus, de consensu doctrinæ Pro- pheticę & Apostolicę, de statu nouis- simi tēporis, de præstātia Paulinæ do- ctrinæ, quæ omnia magno ardore piis inculcat.

### AUTOR.

De autore huius epistolæ litem semper mouerunt Orientales. Nani



vnam saltem D. Petri agnoscunt, unde Niceph. lib. 5. cap. 16. primam solum illi tribuit, secundæ quidem facit mentionem, sed non sine suspitione: idem facit Euseb. lib. 3. ecclesiasticæ historiæ cap. 3. & hodie Syri hanc etiam reiiciunt, quanvis inter Græcos Athanasius hanc ingenuè admittat, quod vel inde constat quòd hanc etiã ut reliquas Apostolicas illustrat synopsi. Occidentales ecclesiæ semper hanc consentienter admiserunt, & sanè si locos ipsos expendas, multa habet cum prima communia, ut locum de cõsensu Propheticæ doctrinæ, locum de ornanda professione vita & moribus, & similes: per cætera nihil habet, quod seu spiret, aut alat heresin. Itaque hanc accipiamus tãquam à spiritu Petri profectam.

**QVIBVS SCRIBATUR.**

In scribendo Apostolus omnium  
sancto-

sanctorum habuit rationē, quod inde colligimus, quia inquit τοῖς ἰσότητων πίσιν λαχέσι, qui parē nobiscum consecuti sunt fidem. Nam hac phrasi æquat Iudæis Gentes in Christo, & Apostolorum fidem ut ut fuerit excellēs gradu, submittit ad omniū credentiū in Christū infirmitatē. Itaque & nobis & toti posteritati scripta est.

## OCCASIO.

Ut constat cap. 1. ver. 14. & 15. vicinus iam erat morti, itaque ut fideles tum viuentes & posteritas haberent testimonium Apostolicæ doctrinæ, hanc secundam scripsit. Præterea ut firmam haberent consolationem in omni fortuna, item ut cautos redderet contra seductores. Ideo cap. 2. tam diligenter describit, quales futuri sint doctores illi: & cap. 3. illorum recenset absurda dogmata, & mores Epicuraicos, ut constaret quid doctrinæ

Apostolicæ conforme esset aut minus. Quare tanquãcygnea catio hæc secunda superiori accessit, cum iam morti esset proximus.

## GENVS.

Genus principale est exhortatoriũ. Nam scopus est excitare ad incrementa virtutũ. Sic cap. 1. hoc facit, & cap. 3. ver. 1. idem indicat, & eiusdem cap. ver. 14. & similibus locis. Accedunt postea quæ hoc illustrat, vt *Επιστημιον*, quo ostēdit hanc verã esse religionem quam ipsi acceperant de Christo, vt cap. 1. ver. 16. non arte confectis fabulis patefecimus vobis virtutem domini Iesu Christi, sed cum fuissetis inspectores illius maiestatis, & ver. 19. habemus firmiorẽ sermonẽ propheticũ, cui si attēdatis rectẽ feceritis. Et cap. 3. ver. 2. iterũ reuocat in mentẽ consensu doctrinæ apostolicę cum doctrina prophetica, quæ apud  
pios



pios vim habent demonstrationis. In multis se præstat etiã vatem, vt cap. 2. prædicit falsos doctores sæper fore in ecclesia, & cap. 3. prædicit in ecclesia fore Epicureos qui vitã æternã & renouationẽ totius creaturæ negaturi sint, & ob id magna leuitate & petulãtia vera dogmata de resurrectione sibilabũt. Sũt quædã etiam *Διδασκαλὰ* vt quod cap. 3. ver. 5. & 9. ostẽdit quocõsilio dominus differat suũ aduentum, nimirũ quod nolit aliquos perire, sed per pœnitentiã ad veritatis cognitionẽ conuerti, id vt fiat tẽpus illis concedit. Itẽ cap. i. cur fides sit ornãda bonis operibus. Sunt quædã etiam *ἐγκωμιαστικά*, vt cap. i. magnificẽ laudat scripturas veteris testamenti, quas nobis proponit tanquã lucernam in tenebris huius mundi lncentem, & eodẽ cap. i. ver. 12. ipsos fideles laudat vt firmos & bene fũdatos in veritate

Sic cap. 3. magnifica laus est Apostoli Pauli & eius doctrinæ. Quædam etiam sunt ψεκτικά, vt cap. 2. & 3. vbi de falsis agit doctoribus. cap. 2. 12. inter alia vocat ἄλογα ζῶα, hoc est bruta animantia, & ver. 13. & consequentibus varijs epithetis illos infectatur. Inter alia κατάρτας τέκνα perditionis filios, & ἐμπαίγτας, hoc est illusores appellat.

### PROPOSITIO.

Propositionem sumo ex cap. 1. ver. 5. & 6. & cap. 3. ver. 18. ex quibus locis hæc sententia eruitur. Pij confitentes Christum semper cauti esse debent contra seductores, & in cursu Christianarum virtutum in dies magis magisque crescere.

### PARTES.

I Partium ordo hic est. Primum pro more epistolari titulus est, comprehendens duos priores versus. 2. Secundo

cūdo loco est exordium ver. 3. quod  
sumitur à magnitudine beneficio-  
rum Dei, ac pertinet ad attētionem.  
Vult enim mentes nostras rapere in  
admirationem beneficiorum eius, vt  
mox Dei exēplo nos hilares efficiat  
sectatores bonorum operum. Senten-  
tia eius est, Deus valde liberaliter cō-  
tulit nobis omnia quæ sunt necessa-  
ria ad vitam æternam consequēdam  
& veram pietatē retinendam. Versu  
5. sequitur generalis *πορταῖς*, quòd  
oporteat bonorum operum studio  
in dies magis & magis crescere. Pro-  
ponitur hoc elegāti gradatione, qua  
complectitur virtutes renati homi-  
nis, ac nititur præcedenti exemplo  
Dei. Ver. 8. sequitur cōfirmatio pro-  
positionis. Ostendit enim cur oport-  
eat his virtutibus incumbere. 1. quia  
sic non erimus otiosi auditores Chri-  
sti. 2. quia sine his cæci sumus & Dei



beneficiis ingrati. 3. studium harum virtutum confirmat electionem nostram. 4. hæ virtutes arcent à nobis errores & quotidiana peccata. 5. per has solas aditus nobis patet & cursus felix ad vitam æternam. 6. quia firmi in fide hac exercitatione habent opus, iudicio & autoritate Petri. 7. quia hoc requirit certitudo Apostolicę doctrinæ, cuius ipse Petrus est & auritus & oculatus testis. Demum hoc ipsum postulat Prophetica doctrina consentiens cum Euangelio. Quinta pars cap. 2. nouam proponit propositionē de vitandis falsis doctōribus, ac videtur inter hæreses præcipuè numerare illud, quod iam correxit in vita & moribus, scil. sine studio bonorum operum profiteri fidem. Initio ergo est *ἀρετῆς* comparatione instituta, Semper erunt hæreses in ecclesia Christi, quemadmodum in veteri

veteri populo fuerunt. Hanc sententiam ἐκθέσει illustrat à doctrina & moribus, comminatione quoque recenset pœnas, & consolatione agit de conseruatione piorum in tam corrupto seculo, & hanc munit exemplo Lothi, mox digreditur in mores dissolutè viuentiũ, quales prorsus sunt Libertini Christianæ professionis.

Tertio cap. repetit initio propositionẽ, quam munit cõsilio scribendi, & suam doctrinã prophetico consensu iterum confirmat. Secundo loco propositionẽ illustrat genere doctrinæ hæreticorum, quod scilicet doctrinam Christi prauis moribus corrupturi sint. Tertio loco cõfutatur istorũ hæreticorum institutũ consilio Dei & manifestis exemplis. Quarto loco opponit corruptæ huic doctrinæ sanctam doctrinam de vitæ innocentia, quæ sola habebit remunerationẽ in

aduentu domini, inde manifestè digreditur in exhortationē ad innocentiam vitæ & morū integritatē, vsque ad ver. 17. Inde sexta cōstituatur pars & vltima, epilogus epistolæ, constās admonitione, repetita etiā propositione, ac tertio *δοξολογία*.



DISPOSITIO PRIMÆ EPI-  
stolæ Ioannis Euangelistæ  
& Apostoli.

*Argumentum.*

**I**oannes Euāgelista & Apostolus informat præsen-  
ti epistola vitam & mores  
hominis Christiani, ac o-  
stendit non satis esse quod dicamur  
filij Dei, aut quod habeamus cōmu-  
nionem cū Deo, ipsū nouerimus, in  
ipso simus, in eo maneamus, aut in lu-  
ce Euāgelij ambulemus, nisi accessse-  
rit vitæ innocentia, & mandatorū e-  
ius



ius obseruátia, quæ omnia in primis ad duo restringit, ad regulá fidei & dilectionis. Interim alios etiá locos persequitur, vt de cognoscendis & probandis spiritibus, de vitandis malis doctoribus & similia.

## A V T O R.

Omniũ consensu hæc epistola est Ioãnis Euágelistæ & Apostoli, quod Syri etiá fatentur. Fuit is filius Zebedæi & frater Iacobi, & inter Apostolos in primis dilectus Domino Christo, vnde in cœna vltima in eius sinu recubuit, & trāsfigurationi in monte adhibitus fuit, & sub cruce ipse solus ex Apostolis adfuit, lōgæuitate quoque præ reliquis donatus est. In quo cursu variá expertus est fortuná. Nā & venenũ gustasse, & oleum feruēs illæsum ingressum esse testatur historia. In Pathmo exulasse certũ est ex Apocalypsi, vnde restitutus Ephesi

c. ij.

adhuc diu vixit, & ibidē mortuus & sepultus, de quo vidē copiosius Hieronymū in vita Ioannis Euangelistæ. Eusebium lib. 3. historiæ ecclesiasticæ cap. 1. 18. 20. 23. & 25.

## QVIBVS DEDICA-

ta sit.

Scribitur præsens epistola ad omnis ætatis homines qui Christū profitentur, quemadmodum cōstat ex 2. cap. ver. 12. in quibus format quasi à cunabulis bonos mores, vnde verē est Canonica. Est enim Canon faciendorum & omittendorū regula. Et quia inter professos pietatē duo genera erant hominum, vt & adhuc sunt, infirmi scil. & gloriosi, vtrosque ad medium reducit, & infirmos præmonet de lapsu, gloriosos verò dehorat ab hypocrisi, ne se ornent titulis Christianæ professionis speciosis, sine morum & vitæ innocentia.

OCCA-

## OCCASIO.

Occasio apparet Apostolo esse oblata quemadmodū in scribendo Euangelio. Nam vt illic excitatus est Cerinthi & Hebionis temeritate, sic in scribēda hac epistola prouocatus est licētia viuēdi, imprimis eorū, qui speciosa nomina Christianæ libertatis perpetuò haberēt in ore, interim his nominibus non respōdebat vita, ideo 1. cap. & 2. ex illorū persona loquens, inquit: Communionem habemus cum Deo: item, cognouimus ipsum: item, in ipso sumus, in ipso manemus, in luce ambulamus. Quę omnia gloriosi professores Christiani nominis sonabāt neglecta obseruantia dilectionis, ad quam eos diligenter hortatur.

## GENVS.

Genus principale, vt apparet, est *θεογονία*, quærit enim qui sint veri filij



Dei, nec in eo contentus est externis  
nominibus huius professionis, sed ex  
ipsis fontibus & effectis filiorum Dei  
& ipsius fidei de re cōstituit. Hoc vt  
cōmodè præstet assumpsit vicina ge-  
nera, Ε' *ωιδειπικόν*, quo colligit veras  
notas & proprietates filiorū Dei, quæ  
infallibiles sūt & cōstituunt Ε' *ωιδειξιν*.  
Sic accedit *Διδακπικόν* docens quid de  
Christo credendum sit, quomodo  
Christus habēdus sit *ιλασηριον* quoq;,  
h. e. propitiatio pro peccato, quomo-  
do distinguēdi sint spiritus, vt eò cō-  
modiūs vitari possint. Sunt quædam  
*ποροτρεωτικα*, vbi expresse hortatur ad  
obseruantia mandatorū Dei, ad præ-  
standam elemosynam, dilectionis  
opera & similes virtutes. Atque hæc  
omnia ad materiam præsentem spe-  
ctant. Genus verò compositionis est  
*αφορισικόν*. Nam breue & sententio-  
sum est, vt singula cōmata ferme toti-  
dem

dē habeant præcepta vitæ, eo genere olim vñ sunt medici, & postea idem assumpserūt philosophi Ethici, & oratores, hinc ad pietatem quoque deuenit.

### PROPOSITIO.

Propositio totius epistolæ hæc est. Filij Dei reuera isti sunt, qui sana de Christo doctrina imbuti fidem integritate vitæ exprimūt. Nam vult Apostolus detrahare hypocritis laruā & speciosos titulos, quibus vtebātur sine fructu, quemadmodum hodie in ecclesia Christi passim speciosa nomina circunferuntur.

### PARTES.

Partes epistolæ sic connecto. Principio est exordiū à re ipsa sumptum, & commodè refertur ad tres locos. Primus est attentio. Nam à rerum magnitudine exorditur. Alter habet docilitatem. Ostēdit enim qua de re fit

acturus. Propositio exordij hâc statuenda est. De filio Dei vos erudiam, & quomodo vos qui nomen illius profitemini in hac vita cōuersari debeatis docebo. Tertius locus exordij ad beneuolentiam facit, ostendit enim ad quid piis profutura sit hæc doctrina. Facit ad veram sanctorum cōmunionem, hoc est, vt profitētes nomen Christi, seriò sint mēbra ecclesiæ, deinde seriò cōmunionem habeāt cum Deo, & demum verè sint Christi filij Dei fratres & mēbra, demum æterno fruātur gaudio. Secundo loco sequitur declaratio filiorum Dei ver. 5. Descripturus autem veros Dei filios, colligit quasdā proprietates, per quas ab hypocritis possint discerni, cum externa professione non cōmodè distinguantur. Itaque intelligendus est Ioannes loqui ex cōmuni professione, cū inquit, Habemus commu-  
nionem



nionē cum Deo, Deū cognoscimus,  
 in Deo sumus, in Deo manemus, in  
 luce ambulamus. Nā his vocibus etiā  
 hypocritæ vtebātur, vt adhuc hodie.  
 Notæ ergo veræ sunt hæ. I. Vita &  
 moribus ābulare in luce. II. interea  
 se fateri peccatorem, vt vt peccata cu-  
 pias cauere. III. seruare mandata Dei.  
 IIII. ad exēplum Christi quā inno-  
 cētissimē viuere. V. amare fratres eiūs  
 dē professionis & in eo dilectionē &  
 fidem declarare. VI. odisse mundū &  
 res mundanas. Et hæc perducuntur  
 vsque ad ver. 18. secūdi cap. Tertia er-  
 go pars istic statuatur, quæ habet lo-  
 cum de cognoscēdo Antichristo & e-  
 ius doctoribus cauēdis, ac videtur per  
 ἡμεῖς additus locus: quemadmo-  
 dum enim veri Dei filij cognoscendi  
 sunt ex suis notis, sic seductores & fi-  
 lij tenebrarum quoque cognoscendi  
 sunt suis proprietatibus. Tractatur

hic locus vsque ad initium tertij cap.  
Capite 3. statuatur quarta pars episto-  
læ, quæ habet reditum ad veras no-  
tas filiorum Dei. Itaque iterum colli-  
gantur hic notæ sanctorū. Initio au-  
tem magnificè extollit dignitatē filio-  
rum Dei, & per præoccupationē di-  
luit cur tâta dignitas in hac vita non  
cōpareat. Hinc subiicit notas hoc or-  
dine. Prima vera filiorū Dei nota est  
spem omnē vitæ in vno Christo col-  
locare. 2. in hoc ipso Christo seipsum  
purgare à peccato. 3. Christū vnicum  
agnoscere remediū contra peccatum  
4. cauere peccatū, ne peccēt ad exem-  
plum Christi. 5. iustitiam quoad fieri  
potest exprimere. 6. re ipsa dilectio-  
nem fraternam declarare. 7. odio esse  
mūdo, & vicissim odio habere mun-  
dum. 8. pro fratribus etiā velle mori,  
quod sic intelligo, non recusare mor-  
tem pro veritatis cognitione, in hoc  
ipsum

ipsum ut fratres in eadem confirmen-  
 tur. Nam dum fratres in ea professio-  
 ne robustiores fiunt, videtur marty-  
 res pro ipsis mori, & hinc digreditur  
 in commendationem dilectionis, &  
 eam ab effectis ornat, ut quod nos cer-  
 tos reddat de veritate, pacatas faciat  
 conscientias, hilarem aditum ad Deum a-  
 periat, certos de exauditione reddat.  
 Ex his colligatur nona proprietas fi-  
 liorum Dei, non tam verbo quam re  
 ipsa fratribus declarare dilectionem  
 10. in omni vita operam dare ut co-  
 ram Deo & omnibus pacatam reti-  
 neat conscientiam. Atque his finitur  
 tertium caput. Quinta pars initio 4.  
 capitis statuatur. Est enim nova ἐπιμ-  
 ῶλη, in qua repetit locum de pro-  
 bandis spiritibus Antichristi, quem  
 explicuerat capite secundo ver. 18. &  
 easdem præscribit ferè notas, quas  
 suprâ iam vidimus. Tractantur hæc



usque ad ver. 7. Illic igitur statuatur 6. pars. Nam redit ad cōmendationem dilectionis. Commēdat autem dilectionē ab ipsis fructibus, & imprimis respondet iactabundis hominibus in quorum vita non perinde elucebat professio quemadmodū in ore. Initio cap. 5. transit ad commēdationem fidei. Nam supra cap. 3. itē 2. ad nouū & vetus præceptum reduxerat omnia, ad nouum præceptum intelligēs doctrinam fidei: vetus autem præceptum, erat præceptū dilectionis, quod tamen Christus certa ratione etiā vocauit nouum. Rectē igitur post commendationē veteris præcepti, h. e. dilectionis, subiicit commendationem noui præcepti, h. e. fidei. Hanc ergo commēdat etiam ab effectis. Nam ex ea nascitur regeneratio, verus amor Dei, amor etiam proximi, obseruātia mandatorū Dei, victoria cōtra mundum

dum, &c. Hinc transit ad subiectum  
fidei quod est Christus, & ostēdit e-  
ius doctrinā niti firmissimis testimo-  
niis. Durant hæc vsque ad ver. 13. Ab  
eo loco septima pars statuatur, Epilo-  
gus: cōtinet autem breuem repetitio-  
nem & summam totius Apostolicæ  
doctrinæ. Deinde exhortationē sub-  
iicit de cauenda idololatria, qua  
finit etiam epistolam.



## COMPOSITIO SECUN- dæ Epistolæ D. Ioannis.

*Argumentum.*



Epistola hæc secunda tra-  
ctat locum de dilectione  
mutua, ad cuius exercita-  
tionem hortatur familiā  
cuiusdā viduæ, & simul præmonet  
de cauendis seductoribus, qui passim  
circuibāt & insinuabant se familijs

præsertim viduarū vt eas seducerēt, dat etiā regulam cognoscēdi tales ex discrepantia morū, & ignorantia doctrinæ Christi, cū quibus nulla debet esse pijs communio. Perniciosa enim est, & contagiosa vt inquit Ioannes.

## A V T O R.

De autore semper variatū est, Asiatici nunquā agnouerunt canonicā, neque retulerunt ad autorē Ioannē Euangelistam, vnde nec Syri hodie illam agnoscūt sed tribuerunt cuidā Ioāni presbytero, occasione sūpta ex inscriptione, quā sententiā refert Eusebius lib. 3. cap. 39. indicans duo esse sepulchra apud Ephesios nomine Ioannis, vnum Ioannis Euangelistæ, cuius præcedens sit epistola, alterum Ioannis presbyteri, cuius hæ duæ posteriores & Apocalypsis. Alij hinc tres cōstituerunt, vt tertius sit Ioānes theologus. Sed possunt posteriora



posteriora duo intelligi epitheta eiusdem personæ, vt presbyter dictus sit idem Ioânes Euangelista nunc in extrema senectute & autoritate summa quâ pollebat apud Asiaticas ecclesias, & idē sit Theologus, h. e. verē habeat cognitionem Dei, & possit de Deo solidē homines instituere. Quā sententiā recitat Euseb. lib. 6. cap. 18. ex Origene, vbi indicat tres epistolas & Apocalypsin ab Origene eidē Ioanni attribui, nodum tamen de duplici sepulchro apud Ephesios non soluit. Hæc sententia hodie recepta est, cui libenter accedo, quia doctrina huius epistolæ superiori congruit, & phrasibus utitur planē Ioannis, alioquin quod compositionem attinget magis discrepat, ac recedit ad compositionem Pauli, qui utitur in omnibus epistolis, titulo, exordiis, propositionibus, confirmationibus,

epilogo, quæ in hac epistola omnino seruata sunt, non perinde ab Ioanne in superiori.

### C V I S I T D E D I C A T A.

Scribitur epistola ad quandã viduam, quæ cū liberis suis verã nunc de Christo hauserat cognitionem, & hanc vita & moribus apprimè orabant. Huic viduæ quod fuerit nomẽ incertũ est. Lyranus Babyloniam facit, & proprio nomine dictã fuisse Electam, & eiusdẽ nominis sororẽ quoque ipsius Electam, sed mirari possis vnde Babyloniam mulieri Romanum nomen, aut si illa Romana fuit, quomodo istuc trãslata. minus placet Allegoria qua nonnulli docet sub Electæ nomine subintelligi totã ecclesiam ad quã scripta sit epistola, verum scire debemus hũc allegoriarũ vsum, tum non ita frequentẽ fuisse, nec aliquis pudor aut metus impediobat Ioannem

annē quin scripturus ad ecclesiā vteretur eo nomine, præterea grauior & amplior indubiè scripta fuisset epistola, si in scribendo sibi proposuisset personā ecclesiæ. Ex consequēti ergo solūm pertinet ad totā ecclesiā, quod hīc scribitur vni personæ. Est enim epistola planè familiaris, qualis illa ad Philemonem.

### A. OCCASIO.

Occasio scribendi oblata est ex familiaritate & quadā priuata cōsuetudine cum hac familia, in qua haud dubiè hospitio fuit susceptus & deprehendit castos mores, & piā de Christo doctrinā absens ergo ad constantiam præsentis & doctrinæ & vitæ cohortari voluit. Accessit indubiè metus futuri lapsus. Videbar enim quid emineret nō solūm priuatis familiis, sed etiā integris ecclesiis, vt facili occasione sæpe mirificè corrumparentur,



ne idē huic familiæ eueniret, præmonere voluit. Quod ipsum Apostolus Paulus sepe inculcauit ecclesiis, & priuatis hominibus, vt est videre in 2. ad Tim. cap. 3.

## GENVS.

Genus principale est *πορρεωτικόν* exhortatoriū. Respexit enim præsentis mores & agnitionem de Christo, in quibus voluit eos cōfirmare. Accedūt huic quædā *Ε'παινετικά*, vt in exordio, & ipso titulo prædicat fidē illorū, vt qui digni sint amore sanctorū. Accedunt etiam quædam *Διδασκτικά*, quibus docet quid sentiendū sit de dilectione, de exhibito iam Christo, de eius doctrina, de notis Antichristi, de seductoribus, de contagione peccati.

## PROPOSITIO.

Propositio est, Vidua & pia illius familia in fide Christi semel suscepta & mutua dilectione cōstanter perdu

rare debet, & simul corruptelas doctrinæ vigilanter cauere. Quæ omnia proponit non solum phrasibus, sed & verbis ipsius Ioannis Euangelistæ.

## PARTES.

Partes epistolæ sunt ita connexæ. Prima est titulus, comprehensus 3. versibus, ac cõpositus more Paulino. Expressit enim personam salutantẽ, personas quibus salus dicitur, & cõprecationẽ. His interposita est *επεμβολή* quæ facit ad beneuolentiã conciliandam. Cõprecationis tria sũt mēbra etiã Apostolo Paulo familiaria, Gratia, pax, & misericordia, quemadmodũ videre est in 1. & 2. ad Timotheũ, & in epistola ad Titũ: his verbis superius Ioannes vsus non est, nec infrà vtitur in tertia. Iacobus simpliciter dixerat *χαίρειν* & Petrus addiderat *πληθουν θείην* multiplicetur. Altera pars v. 4. cõstituatur Exordiũ scilicet, quod & ipsum  
d. ij.

ad beneuolentiam pertinet, exprimit enim bonos mores veri amici, cuius proprium est alienis virtutibus gaudere. Tertia pars est ver. 5. Propositio, cuius primum membrum est, Vidua hæc cum sua familia in exercitio Christianæ dilectionis quàm-constâtissimè perdurare debet. Hoc proponit etiam more Paulino, rogans ubi imperare poterat, & mox hoc ipsum quod rogat, mollit Christiana correctione, præceptum vocans Christi & quidē vetus, quod de dilectione mandauerat, respiciens ad locum Ioannis 13. 14. & 15. Quarta pars ver. 6. cōtinens propositionis ἐκθεσις, ostendit enim quam dilectionem suadeat. Hæc verba iterum phrasibus Ioānis explicantur, sunt enim ὁριστικά, qualia supra in prima epistola cap. 5. ita hoc loco definit quæ sit dilectio, scilicet quæ seruet Dei mandata, quod illi est ambulare



lare in illius mandato. Et mox ἀντιστρέ-  
φει, hoc est, inuertit modū definiē-  
di, & ex eadem sententia definit man-  
datum. Ver. 7. continetur altera pars  
propositionis de falsis doctoribus di-  
ligenter cauendis. Locus pertinet ad  
curam sinceræ fidei & sanæ doctrinæ  
conseruandam, ideo notis aliquibus  
describit corruptores doctrinæ iam  
traditæ, & rei exprimit certum ca-  
sū: continuatur hæc vsque ad ver.  
12. Istic statuatur Epilogus, cuius mē-  
bra sunt excusatio breuitatis, quæ ni-  
titur reiectione in opportunius tem-  
pus, addita est promissio sui aduētus,  
quæ faciebat ad leniendum deside-  
rium eius: tamen aduentus suus causa  
finali commendatur, demum subii-  
ciuntur salutationes.



Ioannes familiari hac epistola hortatur Gaium veterē suum hospitem, vt in studio hospitalitatis pergat, nec moueatur Diotrephis seu minis, seu contrario exēplo, interim cōmendat illi peregrinantes nomine Christi, & inter eos Demetriū natim pium virum & dignum suo hospitio.

## A V T O R.

Statuimus autorem huius epistolæ Ioannē Euangelistā: quæ cōtrā adferuntur, iam suprà partim discussa sūt. Vide in argumēto Hieronymū in vita Ioannis & Papiæ. Apud Syros non quidē est in Canone, sed tamē priuatim legitur ipsorum lingua, vt superior secunda, & consequens Iudæ.

## CVI DEDICATA SIT.

Scribitur ad quendam Gaium, qui quis fuerit non satis cōstat, nisi quod probabili coniectura colligi potest hominē fuisse Romanū, cui astipulatur nomē Gaii, aut si Romanus non fuit, saltē Rom. iure Romanū asciuit nomē, quod ipsū quoq̃ Paulū fecisse diximus. Forte Corinthius fuit patria, aut saltē habitatione. Nam ad Rom. 16. inde scribēs, ait, Salutat vos Gaius hospes meus, & totius ecclesiæ, & cōtrā in priori epistola ad Corinth. cap. 1. gratias agit Deo, quod apud eos neminem baptisarit excepto Crispo & Gaio. Fortē hic ipse Gaius est bene meritus de ecclesia. Nā hoc loco Gaius ab hospitalitate prædicatur, & ille Gaius Paulinus, nō solū Pauli hospes est, sed totius ecclesiæ: quod si fuerit idē Gaius felicissimus fuit hospes, qui Paulū & Ioannem summos aposto-

d.iiij.



stolos suo hospitio exceperit.

## OCCASIO.

Occasio sumpta est à crebris commendationibus fratrum, qui apud Ioannem Gaii hospitalitatē miris laudibus efferebant, & cū hāc etiam ipse Ioannes expertus esset, excitatus est ut absens hanc ipsam in suo hospite commēdaret, hortareturque ad eius virtutis constantiam: simul voluit patefacere eos qui tyrannidem affectabant in ecclesia, ut hosce cauerent.

## GENVS.

Genus principale est *ἀποτροπικόν*. Nam omnino illi scopus est Gaium confirmare in præsenti proposito. Accedunt quæ hoc adiuuant & exornant, *Ε'παινετικά*. Nam ostendit publicis testimoniis commendari suam virtutem, quam suo etiam calculo, & veritatis testimonio exornat. Accedit *Ἐκτικόν*, quo hominem reprobum  
&

& tyrannidem affectantem in ecclesia perstringit. Accedit etiā συσταμόν quo illi cōmendat pios nomine Christi peregrinantes, & gratis docentes Evangelium inter Gentes. Nomina- tim autem συσταμόν est, quod illi com- mendat Demetrium.

### PROPOSITIO.

Propositio est, Gaius quemadmo- dum hactenus, sic deinceps in hospi- talitatis studio perdurare debet, nec moueri contrariis exemplis, quæ ei in hac re obsistebant.

### PARTES.

Partes 5. sūt: Prima est titulus conti- nēs inscriptionē & subscriptionē. Secū- da, exordiū valde ἡθμόν (id est mora- tū) Nā à cōprecatione optat illi felicē cursū in omnib' suis occupationibus, quę planē faciūt ad beneuolentiā, & habēt salutationē, quę alioquin titulis solet coniungi. Tertia est ver. 3. brevis

narratio continens occasionē, qua ad scribendū est inductus, & subiicitur superioribz per *αἰτιολογίαν* hanc illustrat *αὐξήσεις* v.4. Quarta pars est v. 5. propositio, cuius sentētia est: perseverandū est tibi in studio hospitalitatis. Rationes ipsi propositioni inuoluit. Primū, quia opus est *πίπον* hoc est, quod ornet fidelē hominē, & adeò illi sit propriū. Deinde, quia hi sint fratres quibus id præstatur. Et tertio quia sint peregrini, & quarto quod virtutē hāc sequatur laus, quā gratitudinis nomine tibi reponūt, & 5. quia emanat illa laus ad totā ecclesiā, & 6. quia in ipsis quodāmodo Deus recipitur, & 7. pro nomine Christi peregrinatur: 8. gratis docēt Euangeliū. Hinc infert *συμπέρασμα*, ergo nos debemus tales promouere & iuuare. Accedit 9. quod hoc medio reddimur *συνεργοι* hoc est qui ministri veritatis



tatis non sunt, ita efficiuntur, ut & ipsi quasi ministri Christi sint. Hinc *Διωξες* trāsit ad cōtrarium exemplū, & perstringit quendā, qui omnia sua ad priuatas laudes instituebat, cui cōminatur grauē expositulationē. Constat ex eo exēplo studiū tyrānidis in ecclesia maturē radices posuisse. Huic malo exēplo opponit Gaii exemplū, & ei commēdat de nouo Demetrium, quicquid Diotrephes cōtrā dicat. Durāt hæc vsque ad ver. 13. Ibi statuatur 5. pars Epilogus, cuius loci sūt reiectio longioris argumēti, promissio sui aduentus, cōprecatio, & salutationes.

## COMPOSITIO EPISTOLÆ D. IUDÆ.

*Argumentum.*



POstolus Iudas idem vrget argumentum quod superiores Canonicæ epistolæ, nimirum pios oportere

portere vocationi suæ quàm-diligentissimè insistere. Nam Deus etiã punnit vocatos si nõ respondeat vocationi suæ. Hanc sententiã variis exēplis probat, vt historia populi Dei in quo post liberationē ex Ægypto multa extāt iræ diuinæ testimonia, ita inter Angelos exēpla sunt poenarum. Sic in Sodomitis & Gomorrhæis. Hæc & similia applicat ad statum ecclesiæ in qua similia portenta extabāt, quemadmodũ semper etiã adhuc extant.

#### AUTOR.

De autore epistolæ dubitatum olim fuit & adhuc hodie nonnulli dubitant, sed libèter admitto ipsum Apostolum Iudam hanc conscripsisse, eũ, in quã, qui appellatus est Lebbæus & Thaddæus, qui fuit Alphæi filius, & ( vt hic dicit ) frater Iacobi Iusti, & per cõsequens Simonis Cananæi vocatio illius habetur apud Matt. io.

Luc.

Luc. 6. Mar. 9. & repetitur Act. 1. Docuit is Euangelium in diuersis nationibus, Mesopotamia, Ponto, Ægypto & Perside, vbi à Magis, vt tradunt, interfectus est, quòd liberiùs illorum superstitiones reprehenderet. Vide Euseb. lib. 2. cap. 33. Hier. in Catalogo. Cæterùm qui illi hanc epistolam negant, istis ferme vtùtur rationibus. Primùm, quòd non vocat se Apostolum. Deinde, quòd materia ferme cõsarcinata videatur ex 2. epistola Petri capite secundo & tertio, quòd citet apocryphum librum Prophetæ Enoch. Quæ rationes si diligentius examinentur non perinde vrgent. Nam prima illa parum concludit, non vocat se Apostolum: ergo Apostolus non est. Nam facilè responderi potest se in loco neglexisse maiores titulos ad declarandam modestiam & humilitatem, quibus



alioquin iure vti poterat, & iniqua sit  
lex cogere scriptorẽ ad certos titulos.  
Nam Iacobus & Ioannes ab eodẽ ti-  
tulo Apostoli abstinere, cõtenti hu-  
milioribus nominibus, vt serui & si-  
milibus. Et si valeret hoc argumentũ  
eodẽ euerteres epistolas aliquot Pau-  
linas, de quibus tamẽ nemo vnquam  
dubitauit, vt illam ad Philippenses,  
duas ad Theſſalonicenses, & illam ad  
Philemonem, in quibus se non vocat  
Apostolum. Alterum argumentum,  
quod attinet ad similitudinem exem-  
plorũ, quæ videtur sumpsisse ex 2. ca.  
2. Petri. Nihil etiam efficit, nisi hoc sal-  
tem fortè quòd posterius scripserit  
& Petri epistolã legerit, quod magis  
ad laudem facit. Debemus enim supe-  
riorũ doctorum scripta diligẽter euol-  
uere, præsertim in eadẽ religione, cũ  
videamus hoc sèper fuisse in vsu piis,  
& hinc nostris temporibus etiã audi-  
toribus

toribus vtiliter applicantur similia argumenta. Sic posteriores Prophetæ antecedentiū Prophetarum argumēta & rationes suis inferuerunt. Cæterum quid si hoc etiam negetur ac dicat aliquis, non tam ex Petro sumpsit se quàm ex ipsis Prophetis, vnde Petrus eadem habebat. Certū enim est, quòd historiam de populo Dei tam atrociter punito, nō ex Petro habeat, sed refert illam ex Mose, idē ergo dici potest ad reliqua exempla. Nam quod infert de casu Angelorū, de pœnis Sodomorū & Gomorrhæorum, & in genere omnium reprobè viuentium cōmunia habet quidē cum Petro, sed inde ex veteri Testamento cōportata sunt, vnde eadē desumpsit Petrus. Tertiò, quod attinet librum Enoch, imprudenter quædam hīc inferuntur. Primū enim Enoch Prophetæ titulo spoliari non debet, cum

fuerit insignis Patriarcha, qui omnes Propheticum habuerūt Spiritum, & ipsi Iudæi fatentur Enochum quædā scripsisse. Sed dicunt librum apocryphum non rectè citari ad confirmationem. Respōdemus hoc etiam incautè dici. Nam confirmatio applicari debet ad iudiciū auditoris potius, & validissima est ratio quæ auditorum fidem habet. Sic videmus Paulum in suis orationibus non semper vti Prophetarum testimoniis, sed habito auditorum respectu, profert interdum Gentiles poëtas, vt in Act. 17. apud Atheniēses profert testimoniū Arati. Sic in 1. epistola ad Cor. 15. citat Menandrum, & in 1. cap. ad Titū Epimeniden Cretēsem, & ad Tim. Iannem & Iambrē profert nomina Magorum, quæ tamen Moses planè non habet. Eodem iure ergo licuit Iudæ proferre testimonium à sanctissimo Patriarcha



Patriarcha Enoch, quaecunque fuerit illius scriptum, & certum est multorum Prophetarum libros interdixisse, qui si extarent, haberentur in Canone.

### QVIBVS SCRIPTA SIT.

Scripta est hæc epistola vocatis sanctis, hoc est, omnibus fidelibus, seu omnibus profitentibus nomen Christi, quos definit eleganter esse cœtum sanctorum & redemptorum & vocatorum, per Patrem, Filium, & Spiritum Sanctum, qua descriptione statim admonet ecclesiam militantem non satis titulo tenus esse Christianum, sed oportere fidem semel datam omni studio bonorum operum defendere.

### OCCASIO.

Oblata est illi occasio scribendi ex dissolutis moribus Christianorum, qui non solum inualescebant tum in-

ter auditores, sed inter ipsos doctores  
etiā habebant strenuos defēsores. Nā  
illi imprimis possūt doctrinā trahere  
ad ἀσέλγειαν, & illi sunt qui in ἀγῶναις  
h.e. in publicis piorum conuiujs do-  
minabantur, vt videatur imprimis  
doctores perstringere, & hoc lolium  
feliciter sparsit Satan, vt non solū  
iuxta, sed intra ecclesiam Christi sibi  
facella cōderet, & in ministerio sem-  
per haberet defensores & patronos  
vitæ dissolutioris.

## GENVS.

Genus epistolæ principale est etiā  
προτροπικόν vt in superioribus qui-  
busdā: hortatur enim ad defensionē  
fidei, quod illi nihil aliud est quā  
integritate vitæ & morū fidem cōfir-  
mare, quod aliis est innocēter ambu-  
lare, dignè Deo ambulare & similia,  
& ipsa fides est ipsa professio externa.  
Accedūt alia quę seruiūt tractationi,

vt παραδειγμα πικρὸν. Nam cōfirmatio tota exēplaris est, & hinc inde multa sunt Ψεκτικὰ, quibus infectatur istos patronos, & excusatores vitæ dissolutioris. In fine adhibetur etiā εὐκπικρὸν, quo concludit totam epistolam.

### PROPOSITIO.

Propositio sumatur ex ver. 3. ad finem, vbi Apostolus ait se ideo scripsisse, vt hortetur eos ad defensionem semel datæ fidei. Verba Apostoli sunt ἐπαγωνίζεσθαι τῇ πίσει, quorū sensus est profitentes Christianismum, integritate fidei omni studio conseruare debent contra corruptelas seu dogmatum seu morum Christianæ religionis. Quæ omnia eleganter voce à re militari petita proponit.

### PARTES.

Partes epistolæ statuimus. Prima titulum cōplectitur duobus primis versibus, ac continet illustrem defini



nitionem ecclesiæ Christi, quòd sit  
 coetus à Patre sanctificatorum, à Chri-  
 sto conseruatorum, & per Spiritum  
 S. vocatorum. Secunda pars ver. 3. sta-  
 tuatur, exordium scilicet, quod peti-  
 tum est à sua persona & exprimit  
 causas impellentes ad scribendum, cu-  
 ram pro ecclesiis in Apostolo Iuda,  
 & necessariam exhortationē ad con-  
 stantiam. quæ omnia faciunt ad locū  
 beneuolentiæ. 3. pars ad finem ver. 3.  
 expressa est propositio, quod oport-  
 eat sanctos *ἵνα γινώσκωντες τὴν πίστιν*, de qua  
 re nunc dictū est. Obseruetur autem  
 tot modis certamē hoc subeundum  
 esse pro fide, quot modis fides à Sata-  
 na euertitur. Quarta est initio ver. 4.  
 continēs confirmationem. Annectit  
 enim grauissimas rationes, cur pro fi-  
 de certandum sit. Quæ fermē in hūc  
 cadunt ordinem & numerum, Pri-  
 mum à presenti periculo, quia iā mul-

ut corruptores fidei grassentur in ecclesia. Deinde ab exemplo populi veteris, ex cuius historia ostendit quod Deus etiam non parcat vocatis ad sui cognitionem, nisi respondeant vocationi, ideo eductos ex Aegypto passim in deserto deleuit. Vide Ex. 16. 17. 32. Num. 11. 14. 16. & passim alijs locis. Argumentum hoc terrorem incutit vocatis ut insistant suæ vocationi.

Tertium argumentum v. 6. ponitur ab exemplo Angelorum, qui & ipsi grauissimas domini poenas experti sunt, & adhuc experientur hanc ipsam ob causam, quod vocationi suæ non insisterent. Quartum v. 7. ab exemplo Sodomorum & Gomorræ, quæ vrbes hoc ipso nomine perierunt. Octauo v. exempla posita applicantur ad statum ecclesiæ ut ostendat quales corruptores fidei in ipsa nunc grassentur. Ver. 9. quintum argumentum

à maiori ductum, quod & ipsum exemplū habet Arch. Michaelis, ei annexa est applicatio specialis v. 10. qua ostenditur corruptores sanæ fidei imprudenter agere: annexa est conclusio per exclamationem, in qua noua adducuntur exempla quibus seducorum mores declarentur. Atque hactenus expressa cōfirmatio propositionis. Ver. 12. quinta pars est digressio à confirmationis loco. Nā intermissis rationibus pleniori descriptione corruptelas & corruptelæ patronos diligenter depingit: locus totus *λεπτός* est. Durant hæc vsque ad v. 17. quo redit ad exhortationes, nec obscurè propositionis scopum repetit, cum reuocat sanctos ad Apostolicam doctrinam in hac quæstione, annectit etiā nouas quasdam rationes, quæ nituntur pronuntiatis & ostendunt periculum ecclesiæ iam esse paratum



ratum addit his *ἐκ θεοῦ*, qua monstrat  
 tanquam digito qui sint corruptores  
 & patroni dissolutioris vitæ. Contra  
 ostendit quibus virtutibus oporteat  
 aduersus has corruptelas pugnare,  
 scilicet fide, oratione ardenti, dilecti-  
 one, spe firma, certo iudicio contra  
 peccatum, & odio irremisso aduer-  
 sus scelera. Versu. 24. statuatur sexta  
 pars epilogus, *δοξολογία* constans, &  
 est prorsus more Paulino compo-  
 situs. Confer enim verba Epilogi hu-  
 ius cum his quæ sunt in epilogo in  
 epist. ad Rom. 16. cap. ver. 25. & 27. vi-  
 debis aut inde hæc esse petita, aut  
 certè quod probabilius est eundem

Spiritum S. vtrique tam Pau-  
 lo quàm Iudæ eandem  
 formulam perorandi  
 dictasse.

FINIS.



Ob. G. II. 3781

tamen addit his & quod non monitus  
 tandem digni fuerint corruptores  
 & patroni dissolutionis vite. Contra  
 ostendit quibus virtutibus oportet  
 aduersus has corruptelas pugnantem  
 resistere. Et oratione aduersus effecti-  
 ones, spe firmas, certo iudicio contra  
 peccatum, & odio inueniunt aduer-  
 sus seculum. Versu 24. stantur seculi  
 per epilogus, & 25. & 26. constans, &  
 est protus more Paulino composi-  
 tus. Constat enim verba Epilogi huius  
 in eum, hoc doctrina epilogi in  
 epistolam Romanensem cap. 12. & 13. & 14.  
 debere aut inde hoc esse patet, aut  
 certe quod probabilis est eandem  
 spiritum & veritatem Pauli.

lo quam inde eandem  
 formulam petendi

distalle

FINIS